

Jon

ndê bapia ñamata-nga

Yom whê bapia dindéc sa-nga

Ngac nañ to bapia dindéc, nañ whê dau sa yêc bapia dau ñalôm dom, magoc lau tiguauc daêsam sêsôm bu Jon, Yisu ndê aposel nañ to Jon ndê ñawaê ñayham, nañ to bapia dindéc whiñ. Inj to bapia dindéc gic lau sêkêñ whiñ-nga hoñ ñawaê. Lau ñatô gauc gêm bu Jon to bapia dindéc têtñ ndoc inj ti ñamalac andô ma ndöc malac Epesas, ma bocdinañ inj to bu lau gameñ Esia-nga sêsam muñ.

Jon kêñ puc lau sêkêñ whiñ-nga pi kédôhônwaga tasan nañ sêsôm bu ñamalac si ñamlic ma gêtñ nom-nga hoñ tisac su. Bocdinañ sêsôm yom pi Anötö ndê Atu (Mesaya) bocdec bu, oc tôm dom bu inj sip nom ma mbo tôm ñamalac. Ma sêsôm bu Yisu inj ñamalac ñambwa, ma sêkêñ whiñ dom bu inj Anötö ndê Atu me Anötö ñandô. Ñac sêtoc lau si gauc sa kêtêc ma sêsôm bu datap gauc sa, dec tôm bu dambo dawhiñ Anötö. Ma sêlic ñamalac si lêtñ gitôm gêtñ ñambwa, dec sêhêgo dau pi mêtê atac whiñ-nga dom, ma gauc gêm bu oc tôm bu lau sêkêñ whiñ-nga sêkôm mêtê sac ñapan.

Jon kêñ puc inj ndê lau bu sêsôc yom tasan kainj dinañ ñapu dom, ma sêsap yom ñandô pi Yisu Kilisi ma mêtê atac whiñ-nga dôn ñanğa.

*Anötö ndê Atu meŋ mbo nom ti ŋamalac
ŋandô*

¹⁻² Yac bu ahoc yom ŋandô asê têt mac, pi Yisu naŋ dasam bu ‘Yom Tanli-ŋga.’ In yac neŋ dambo tanli ŋapaŋ-ŋga ŋahu, naŋ mbo whiŋ Damaŋ Anötö têt têt ŋamata-ŋga andô, ma tiŋambu hoc dau asê têt yac. In meŋ mbo nom whiŋ yac, dec yac alic in pi tanôn, amasec in ŋa amaŋ, ma aŋgô in dau ndê yom. Ma bocdinaŋ dec yac bu apuc yom pi tanli ŋahu dau dôn bu yom ŋandô. ³ Aêc! Yac ahoc yom asê têt mac, pi in naŋ yac alic ti aŋgô su. Yac atac whiŋ bu mac akôc yom dau sa, dec yac hoŋ oc dapiŋ dauŋ dôn ti dasap yom ŋandô pi Yisu dôn. Ma yom ŋandô dau oc piŋ yac hoŋ dôn danem damiŋ Damaŋ Anötö lu in ndê Atu, Yisu Kilisi. ⁴ Yac ato yom dindec têt mac, ma akêŋ batan bu mac oc akôc sa, dec oc kôm yac hoŋ datisambuc.

Taŋsêlêŋ dambo Anötö ndê ŋawê ŋalôm

⁵ Ŋawaê naŋ Yisu dau gic dulu têt yac, naŋ yac ahoc asê têt mac bocdec bu, Anötö in Ŋawê Ŋadau, ma mêtê ŋasec-ŋga daŋ yêc in-ŋga dom. ⁶ Bocdinaŋ yac bu dasôm bu dati Anötö ndê lau, tigeŋ dasa lêŋ ŋasec-ŋga, goc yac lau tasaŋ, ma taŋkuc yom ŋandô dom. ⁷ Magoc yac bu dasa neŋ lêŋ dambo ŋawê ŋalôm gitôm Anötö dau mbo ŋawê ŋalôm, dec ŋawê dau piŋ yac dôn dawhiŋ dauŋ, ma in ndê Atuŋgac Yisu ndê dac oc êŋgwasiŋ yac neŋ sac hoŋ su. ⁸ Yac bu dasôm bu yac neŋ sac mbasi, dec oc taŋsau dauŋ, ma yom ŋandô yêc yac neŋ ŋalôm dom. ⁹ Magoc yac bu dapu dauŋ ma dahoc neŋ sac asê têt Anötö,

dec dakêñ whiñ bu iñ oc suc yac neñ sac kwi, ma êñgwasiñ yac neñ ñalôm ñawasi sa tiyham. Bu Anötö kôm gêñ gitêñ eñ, ma dakêñ whiñ bu gêñ bocke nañ iñ kêmatiñ tidôñ bu kôm, nañ iñ oc kôm. ¹⁰ Yac bu dasôm bu yac neñ sac mbasi, nañ tôc asê bu dalic Anötö ndê yom gitôm yom tasan, ma iñ ndê yom ñandô dañ yêc yac neñ ñalôm dom.

2

Yisu gêm yac awhañ têt Damañ

¹ O aneñ balêkoc, aö atac whiñ bu mac ahu mêtê sac siñ gacgeñ, ma tu dinañ-nga dec aö gato yom dindec têt mac. Tigeñ yac neñ dañ bu kôm sac ma pu dau, goc yac neñ ñgac nem yac awhañ-nga mbo bu nem yac sa. Iñ ñgac gitêñ Yisu Kilisi, ma iñ oc lhac ñalhu ma nem yac awhañ têt Damañ. ² Iñ kêñ dau ti da ma mbac ndu ô yac, ma gêmlihi yac neñ sac ñatôp su. Magoc iñ kôm gêñ dau tu yac tañwasêñ-nga dom, iñ gêmlihi lau nom-nga hon si sac ñatôp bocdinañ.

³ Yac bu dañañ wambu iñ ndê yomsu, dec oc tôc asê bu tañyalê iñ tidôñ. ⁴ Asa nañ sôm bu, “Aö kayalê iñ tidôñ,” tigeñ danğa wambu iñ ndê yomsu dom, nañ kôm tasan, ma yom ñandô yêc iñ ndê ñalôm dañ dom. ⁵ Magoc asa nañ kôc Anötö ndê yom sa ma danğa wambu, nañ Anötö ndê mêtê atac whiñ-nga gêm ñandô su yêc iñ ndê ñalôm. Ma yac tañyalê bu dati Anötö ndê lau ñalêñ bocdec. ⁶ Yac bu dasôm bu dati iñ ndê lau, nañ goc dasa lêt gitêñ tôm Kilisi dau mañ.

Yisu ndê yomsu pi mêtê atac whiŋ-ŋga

⁷ Aneŋ lau atac whiŋ-ŋga. Aö bu wapuc yomsu naŋ mac akôc su têtŋ ndoc mac akêŋ whiŋ tiwakuc, naŋ dôŋ, magoc aö bu wato tôm yomsu wakuc dom. Inŋ yomsu akwa naŋ mac aŋgô têtŋ ndoc lau sêhoc yom pi Yisu asê têtŋ mac. ⁸ Magoc kwahic dec aö bu wato yomsu dau tiwakuc tiyham têtŋ mac. Yisu ndê lêŋ hoŋ tôc yomsu ŋa-ŋandô asê, ma mac nem lêŋ wakuc kôm yomsu dau ŋandô sa bocdinaŋ. Bu têtŋ ŋasec-ŋga kêpiŋ bu pacndê, ma ŋawê ŋandô dau po asê su.

⁹ Asa naŋ sôm bu inŋ mbo ŋawê ŋalôm, tigenŋ atac whiŋ inŋ ndê asidôwai dom, naŋ gacgeŋ mbo ŋasec ŋalôm. ¹⁰ Magoc asa naŋ tac whiŋ inŋ ndê asidôwai, naŋ mbo ŋawê ŋalôm, ma tu dinaŋ-ŋga gêŋ daŋ oc kôm inŋ peŋ dom. ¹¹ Aö wasôm tiyham, bu asa naŋ gêlic inŋ ndê asidôwa sac, naŋ mbo ŋasec ŋalôm. Inŋ kêsêlêŋ mbo ŋasec, ma ŋasec dau kôm inŋ tandô tipec e inŋ kêyalê gameŋ naŋ inŋ kêsêlêŋ mbo, naŋ dom.

¹² O aneŋ balêkoc, aö gato yom dindéc têtŋ mac, ŋahu bu Anötô suc mac nem sac kwi su tu Yisu ndê ŋaê-ŋga. ¹³ Ma aö gato yom têtŋ mac lau andô, bu mac aŋyalê inŋ naŋ mbo têtŋ têtŋ ŋamata-ŋga ma mbo ŋapaŋ. Ma aö gato yom têtŋ mac lau batac, bu mac aku Sadaŋ dulu su. O aneŋ balêkoc, mac aŋyalê Damaŋ tidôŋ su, dec aö gato yom têtŋ mac. ¹⁴ Mac lau andô, mac aŋyalê inŋ naŋ mbo têtŋ têtŋ ŋamata-ŋga, ma mbo ŋapaŋ, ma bocdinaŋ dec aö gato yom têtŋ mac. Ma mac lau batac, mac alhac ŋaŋga

ma danam wambu Anötö ndê yom nan tidôn yêc nem ñalôm, ma mac aku Sadañ dulu su. Tu dinañ-nga dec aö gato yom dindec têtj mac.

Dasap gêtj nom-nga dôñ dom

¹⁵ Asa nan tac whiñ gêtj nom-nga, nan Daman Anötö ndê atac whiñ yêc iñ ndê ñalôm dom. Bocdinañ atac whiñ nom ti gêtj nom-nga dom.

¹⁶ Nahu bu lau nan atac whiñ gêtj nom-nga kêlêc, nan sêsa lêñ ñalôm ñagalac-nga, ñac tagatu gêtj, ma sêtoc dau sa tu ñac si gêtj nom-nga-nga. Mêtê kaiñ dinañ iñ mêtê nom dindec-nga ñambwa, nan ñadañ meñ akêtj Daman Anötö dom. Mba! ¹⁷ Ma nom dindec ti mêtê nom dindec-nga gic waê bu niñga, tigen asa nan sap Anötö ti iñ ndê lêñ gitêtj dôñ, nan oc niñga dom, iñ oc mbo tali ñapan.

*Kilisi ndê Nacyo**

¹⁸ O aneñ balêkoc atac whiñ-nga, têtj kwahic dec-nga ti têtj ñambu-nga. Mac anğô su bu Kilisi ndê ñacyo oc meñ, ma kwahic dec Kilisi ndê ñacyo daêsam sêhêc asê yac su. Ma bocdinañ dec tanjalê bu têtj ñambu-nga dau dindec. ¹⁹ Lau dinañ muñ-nga sêmbo sêwhiñ yac lau dakêtj whiñ-nga, magoc sêhu yac siñ, dec tanjalê bu ñac yac neñ lau solop dom. Nac bu yac neñ lau solop, oc sêhu yac siñ dom.

* **2:17** Kilisi ndê ñacyo - yêc Yom Grik sêto ‘anti-kristos.’ Yom dau danem kwi bu ‘Iñ nan bu kôc †Mesaya (Kilisi) ndê mala,’ ma yom dau hêganônñ lau tasan nan sêñsau lau bu ñac Mesaya dau, ma sêsc yom ñandô pi Yisu ahuc. Jon to yom ñatô pi ñac yêc 1 Jon 4:1-6.

²⁰ Tigeŋ Yisu kênj Nalau Dabuŋ sip mac nem ŋalôm su, ma mac hoŋ anyalê su bu yom bocke iŋ yom ŋandô. ²¹ Aö gato bapia dindéc têtj mac tu wawhê yom ŋandô sa têtj mac-ŋga dom. Mba! Mac anyalê yom ŋandô su, ma yom tasanj daŋ meŋ akêŋ Yom Nandô Nadau Anötö dom. ²² Aö bu watôc ŋgac tasanj-nda asê têtj mac. Asa naŋ sôm bu Yisu iŋ †Mesaya dom, naŋ Kilisi ndê ŋacyo, ma sêc yom ŋandô pi Damanj Anötö lu Atu ahuc. ²³ Bu asa naŋ sôm bu Yisu iŋ Anötö ndê Atu dom, naŋ ti Damba ndê gêtj dom. Magoc asa naŋ kêtj whiŋ bu Yisu iŋ Anötö Atu, naŋ ti Damba ndê gêtj. ²⁴ Ayob daôm ŋapep bu yom ŋandô naŋ mac aŋgô têtj ndoc mac akêŋ whiŋ tiwakuc, naŋ tidôŋ yêc nem ŋalôm ŋapanj. Yom dau bu yêc nem ŋalôm ŋapanj, dec yom dau piŋ mac dôŋ am damiŋ Atuŋgac ma piŋ mac dôŋ am damiŋ Damba whiŋ. ²⁵ Ma bocdinaŋ mac oc atap mwasin dandöc taŋli ŋapanj-ŋga sa, tôm iŋ gic bata têtj yac su.

²⁶ Aö gato yom dindéc bu wakêtj puc mac pi lau naŋ bu sêŋsau mac. ²⁷ Aŋgô su naŋ! Nalau naŋ gêm gôliŋ lau tasanj dinaŋ, iŋ Nalau Dabuŋ dom. Magoc Yisu kêtj Nalau Dabuŋ têtj mac su, ma iŋ Nalau Yom Nandô-ŋga. Ma iŋ mbo nem ŋalôm ŋapanj bu êndôhônj mac pi gêtj hoŋ. Tu dinaŋ-ŋga mac apônda lau tu sêndôhônj mac-ŋga dom. Bocdinaŋ aŋkuc yom naŋ Nalau Dabuŋ kêtj têtj mac, ma asap Yisu dôŋ ŋapanj.

Anötö ndê Balêkoc

²⁸ Anenj balêkoc, aö wasôm têtj mac bu asap Kilisi dôŋ. Ma boc-dinaŋ têtj ndoc iŋ mbu meŋ

ma hoc dau asê, nañ yac oc dalhac iñ aṅgô-ṅga ti atac pa su ma mayañ daun dom. ²⁹ Mac aṅyalê su bu iñ ndê lêṅ hoṅ iñ lêṅ gitêṅ eṅ, ma bocdinañ aṅyalê bu lau hoṅ nañ sêsa lêṅ gitêṅ, nañ Anötö kôm ṅac sêtiwakuc sêti iñ ndê balêkoc su.

3

¹ Alic su nañ. Damañ Anötö tac whiñ yac ndu andô, dec sam yac bu iñ ndê balêkoc. Ma yac dati iñ ndê balêkoc su yomandô. Magoc lau nom dindec-ṅga sêṅyalê yac bu Anötö ndê balêkoc dom, ṅahu bu ṅac sêṅyalê iñ dom bocdinañ. ² O aneñ lau atac whiñ-ṅga, kwahic dec yac tañyalê su bu dati Anötö ndê balêkoc, magoc ṅalêṅ bocke nañ yac oc dambo têṅ têm ṅambu-ṅga, nañ Anötö tôc asê têṅ yac su dom. Tigeñ têṅ ndoc Yisu mbu meñ, nañ yac oc dalic iñ ndê ṅawasi ti lêṅ nañ iñ dau mbo, ma tañyalê bu yac oc dambo ṅalêṅ kaiñ tigeñ. ³ Ma lau hoṅ nañ sêkêṅ bata gêṅ dinañ, nañ sêmasañ dau si ṅalôm ṅawasi sa, ma sêsa lêṅ ṅawasi tôm iñ dau.

⁴ Asa nañ kôm sac, nañ kêgili Anötö ndê yomsu. Bu sac ṅahu sip yac dakôm gêṅ nañ so Anötö ndê yomsu. ⁵ Magoc mac aṅyalê bu Yisu sip meñ bu kôc yac neñ sac su. Ma iñ dau ndê sac mbasi. ⁶ Bocdinañ asa nañ sap Yisu dôn, nañ hu mêtê sac siñ ndic ṅawaê. Magoc asa nañ kôm sac ṅapañ, nañ ndê gauc sa pi Yisu dom, ma kêyalê iñ dom.

⁷ Aneñ balêkoc, ayob daôm bu ṅamalac dañ êṅsau mac pi mêtê sac dom. Asa nañ kôm mêtê ṅayham, nañ ti ṅamalac gitêṅ kêkuc Yisu dau ndê lêṅ gitêṅ. ⁸ Magoc asa nañ kôm sac, nañ

ti Sadaŋ ndê. Bu Sadaŋ dau kôm sac têtj têtj n̄amata-n̄ga andô ma kôm n̄apan e meŋ. Anötö ndê Atu sip nom meŋ naŋ n̄ahu bocdec bu, tu bu seŋ Sadaŋ ndê gwelen su. ⁹ N̄amalac bocke naŋ Anötö kôm in̄ tiwakuc, naŋ puc dômbwê mêtê sac. N̄ahu bu Anötö ndê yom yêc in̄ ndê n̄alôm gitôm gêŋ n̄awhê n̄ayham. Yomandô! Gitôm dom bu in̄ sap mêtê sac dôŋ, n̄ahu bu Anötö kôm in̄ tiwakuc su. ¹⁰ Tu dinaŋ-n̄ga dec taŋyalê yêc awê lau bocke naŋ sêti Anötö ndê balêkoc, ma n̄ac naŋ sêti Sadaŋ ndê. Lau naŋ sêsap lêtj gitêtj dôŋ dom, ma n̄ac naŋ sêtec si asidôwai, naŋ sêti Anötö ndê balêkoc dom.

Mêtê atac whiŋ asidôwai-n̄ga

¹¹ Yom atu naŋ sêhoc asê têtj mac têtj ndoc mac akêŋ whiŋ tiwakuc, naŋ bocdec bu, yac atac whiŋ neŋ asidôwai sêkêŋ whiŋ-n̄ga dandic n̄awaê. ¹² An̄kuc Kein dom, bu in̄ kêkuc lêtj atac whiŋ-n̄ga dom. In̄ Sadaŋ ndê atu, ma gic asi Abel ndu. N̄ahu bu in̄ dau ndê lêtj sac, ma in̄ gêm lêmun̄ Abel ndê lêtj solop.

¹³ O asidôwai. Lau nom-n̄ga bu sêtec mac, naŋ ahêgo daôm dom. ¹⁴ Yac taŋyalê bu dahu seŋ dambac ndu-n̄ga siŋ, ma dambo seŋ dandöc taŋli-n̄ga. N̄ahu bu yac atac whiŋ asidôwai. Lau naŋ atac whiŋ asidôwai dom, naŋ gacgeŋ sêmbo seŋ sêmbac ndu-n̄ga. ¹⁵ Asa naŋ atac tec in̄ ndê asidôwa, naŋ Anötö gêlic in̄ gitôm n̄gac ndic n̄amalac ndu-n̄ga. Ma mac aŋyalê su bu asa naŋ gic n̄amalac ndu, naŋ wêkaiŋ gamen̄ dandöc taŋli n̄apan-n̄ga dom.

16 Yac tañyalê mêtê atac whiñ-nga ñahu bocdec bu. Yisu Kilisi dau mbac ndu tu yac-nga. Bocdinañ dakêñ dañ sambuc tu danem asidôwai sa-nga e tòm dambac ndu tu ñac-nga. 17 Asa nañ gêlic asidôwa dañ pônnda dau, ma ndê gêñ yêc tu nem in sa-nga, magoc tawalô in ma gêm in sa dom, nañ têt asê bu Anötö ndê mêtê atac whiñ-nga yêc in ndê ñalôm dom. 18 O aneñ balêkoc, yham dom bu dasôm bu yac atac whiñ asidôwai ña yom ti whañsuñ ñambwa. Danem ñac sa, goc têt asê bu yac atac whiñ ñac yomandô.

Dalbac ti atac pa su yêc Anötö anğô-nga

19-20 Bocdinañ, yac bu atac whiñ neñ asidôwai, goc tañyalê tidôn bu tañkuc lêt yom ñandô-nga. Magoc yac bu ñalôm ñawapac yêc Anötö anğô-nga tu mêtê ñatô nañ dakôm-nga, nañ goc gauc nem yom bocdec bu. Anötö kêyalê yac neñ ñalôm ti gêñ hoñ, ma in ndê tawalô in gêñ atu. Ma yom dau gitôm bu kôm yac ñalôm pêñ dôñ. 21 O aneñ lau atac whiñ-nga, yac bu ñalôm lu-lu tu neñ lêt-nga dom, dec oc tòm bu datigasuc Anötö ti atac pa su. 22 Ma tañyalê bu gêñ nañ daten, nañ in oc kêt têt yac. Ñahu bu yac dasôc in ndê yomsu ñapu, ma dakôm mêtê nañ in gêlic ñayham. 23 Ma in ndê yomsu dau bocdec bu. Dakêñ whiñ in ndê Atu Yisu Kilisi, ma atac whiñ neñ asidôwai tòm in gic atu yac. 24 Lau hoñ nañ dañga wambu Anötö ndê yomsu, nañ sêmbo in ñalôm, ma in mbo ñac ñalôm. Ma tañyalê bu in mbo yac ñalôm, tu Ñalau Dabuñ nañ in kêt têt yac-nga.

4

Tarṣahê ṅalau hoṅ

¹ O aneṅ lau atac whiṅ-ṅga, akêṅ whiṅ lau hoṅ naṅ sêsam dau bu Anötö ndê propet, naṅ dom. Mba! Ayob daôm ṅapep, bu propet tasanṅ daêsam sêhóc asê su. Bocdinaṅ aṅsahê ṅac si yom, tu bu alic bu Anötö ndê ṅalau gêm gôliṅ ṅac, me mba. ² Ma mac oc aṅyalê Anötö ndê ṅalau ṅalêṅ bocdec. Asa naṅ sôm bu Yisu Kilisi meṅ ti ṅamalac ṅandô ma mbo nom, naṅ Anötö ndê ṅalau gêm gôliṅ iṅ. ³ Tigeṅ lau hoṅ naṅ sêsêc yom ṅandô pi Yisu ahuc, naṅ sêkóc Anötö ndê ṅalau dom. ṅalau naṅ gêm gôliṅ ṅac, naṅ Kilisi ndê ṅacyo ndê. Mac aṅgô su bu Kilisi ndê ṅacyo oc meṅ, ma iṅ meṅ hóc asê nom su.

⁴ Aneṅ balêkoc, mac ati Anötö ndê, ma mac aku ṅac lau tasanṅ dinaṅ dulu su. ṅahu bu Anötö ndê ṅalau naṅ mbo mac nem ṅalôm, naṅ hóc gêlêc Sadaṅ, naṅ mbo lau nom-ṅga si ṅalôm, naṅ su. ⁵ Lau tasanṅ dinaṅ si ṅahu yêc nom, ma sêsôm yom nom-ṅga ṅambwa. Ma lau nom-ṅga sêkóc ṅac si yom sa. ⁶ Magoc ṅac sêkóc yac mba yom sa dom, ṅahu bu ṅac sêti Anötö ndê lau dom. Yac ati Anötö ndê, ma lau hoṅ naṅ sêṅyalê Anötö, naṅ sêkóc yac mba yom sa. ṅalêṅ dinaṅ dec yac tanyalê lau asa naṅ Anötö ndê ṅalau Yom ṅandô-ṅga gêm gôliṅ ṅac, ma lau asa naṅ Sadaṅ ndê ṅalau yom tasanṅ-ṅga gêm gôliṅ ṅac.

Mêtê atac whiṅ-ṅga ṅahu Anötö dau

⁷ O aneṅ lau atac whiṅ-ṅga, yac atac whiṅ neṅ asidôwai dandic ṅawaê, bu mêtê atac whiṅ-ṅga meṅ akêṅ Anötö dau. Lau hoṅ naṅ atac whiṅ

asidôwai, naŋ Anötö kôm ŋac sêtiwakuc, ma ŋac sênyalê inŋ tidôn. ⁸ Asa naŋ tac whiŋ ndê asidôwai dom, naŋ kêyalê Anötö dom, bu Anötö inŋ mêtê atac whiŋ-ŋga ŋahu. ⁹ Ma inŋ tôc inŋ ndê mêtê atac whiŋ yac-ŋga yêc awê bocdec bu. Inŋ kêŋ inŋ ndê Atu tigenŋ sip nom meŋ, bu yac datap seŋ dandöc taŋli-ŋga sa yêc inŋ. ¹⁰ Yac neŋ mêtê atac whiŋ Anötö-ŋga naŋ ti mêtê atac whiŋ-ŋga ŋa-ŋahu andô dom. Tigenŋ Anötö ndê mêtê atac whiŋ yac-ŋga, naŋ mêtê atac whiŋ-ŋga ŋa-ŋahu andô. Bu inŋ kêŋ ndê Atu sip nom meŋ, ma kêŋ dau ti da bu nemlhi yac neŋ sac ŋatôp.

¹¹ O aneŋ lau atac whiŋ-ŋga, Anötö tac whiŋ yac ndu andô, ma bocdinaŋ yac atac whiŋ neŋ asidôwai dandic ŋawaê. ¹² Ŋamalac daŋ gêlic Anötö su dom, tigenŋ yac bu atac whiŋ neŋ asidôwai ŋandô, dec Anötö mbo yac neŋ ŋalôm, ma inŋ ndê mêtê atac whiŋ-ŋga gêm ŋandô su yêc yac neŋ ŋalôm.

¹³ Yac taŋyalê bu dambo inŋ ŋalôm ma inŋ mbo yac ŋalôm, tu Ŋalau Dabuŋ naŋ inŋ kêŋ têtŋ yac-ŋga. ¹⁴ Damaŋ Anötö kêkiŋ ndê Atu sip nom meŋ bu nem lau nom-ŋga si. Yac alic su, dec ahoc asê têtŋ lau bu yomandô. ¹⁵ Ma asa naŋ kêŋ whiŋ ma sôm asê bu Yisu inŋ Anötö ndê Atu, naŋ mbo Anötö ŋalôm ma Anötö mbo inŋ ŋalôm. ¹⁶ Yac taŋyalê ti dakêŋ whiŋ su, bu Anötö atac whiŋ yac ndu andô. Bu Anötö inŋ mêtê atac whiŋ-ŋga ŋahu, ma asa naŋ sap mêtê atac whiŋ-ŋga dôŋ, naŋ mbo Anötö ŋalôm, ma Anötö mbo inŋ ŋalôm. ¹⁷ Ma ŋalêŋ dau dinaŋ inŋ ndê mêtê atac whiŋ-ŋga gic dabiŋ dau yêc yac neŋ ŋalôm, ma

yac dasa neŋ lëŋ gitôm in ndê, tôm yac neŋ têm dambo nom-ŋga hoŋ. Tu dinaŋ-ŋga dec yac oc dalhac ti atac pa su tēŋ bêc Anötö êmatôc yac-ŋga. ¹⁸ Tēŋ ndoc Anötö ndê mêtê atac whiŋ-ŋga gic dabiŋ dau su yêc yac neŋ ŋalôm, naŋ yac datôc dauŋ tiyham dom. Magoc asa naŋ töc dau tu Anötö ndê bêc matôc-ŋga, naŋ tôte asê bu Anötö ndê mêtê atac whiŋ-ŋga gic dabiŋ dau yêc in ndê ŋalôm su dom.

¹⁹ Yac taŋkuc mêtê atac whiŋ-ŋga, ŋahu bu Anötö atac whiŋ yac muŋ su. ²⁰ Asa naŋ sôm bu, “Aö atac whiŋ Anötö,” tigeŋ tec in ndê asidôwa, naŋ kôm tasan. Ŋahu bu asa naŋ tec asidôwa naŋ in gêlic su, naŋ gitôm dom bu tac whiŋ Anötö naŋ in gêlic su dom. ²¹ Ma Anötö gic yomsu yac bocdec bu, “Asa naŋ atac whiŋ aö, naŋ atac whiŋ in ndê asidôwai maŋ.”

5

Dakêŋ whiŋ Yisu Kilisi, Anötö Atu

¹ Lau hoŋ naŋ sêkêŋ whiŋ bu Yisu in Mesaya dau, naŋ Anötö kôm ŋac sêtiwakuc sêti in ndê balêkoc. Ma asa naŋ tac whiŋ Damba, naŋ tac whiŋ lau naŋ sêti in ndê balêkoc, naŋ sêwhiŋ. ² Ma yac datôte asê bu yac atac whiŋ Anötö ndê balêkoc ŋalêŋ bocdec bu, yac atac whiŋ Anötö dau, ma dasôte in ndê yomsu ŋapu. ³ Yomandô! Yac atac whiŋ Anötö ŋalêŋ bocdec bu, daŋaŋ wambu in ndê yomsu. Ma in ndê yomsu kêŋ wapac yac dom. ⁴ Lau hoŋ naŋ Anötö kôm ŋac sêtiwakuc, naŋ sêku ŋaclai sac nom-ŋga dulu. Ma gêŋ naŋ ku ŋaclai sac nom-ŋga dulu, naŋ yac

neŋ dakêŋ whiŋ. ⁵ Sen tigen yêc bu daku ŋaclai sac nom-ŋga dulu, naŋ dakêŋ whiŋ bu Yisu iŋ Anötö ndê Atu.

Gêŋ naŋ sêpuc yom ŋandô pi Yisu dôn

⁶ Yisu Kilisi sip nom meŋ, ma bu ti dac whê iŋ sa bu Anötö Atu. Bu ŋambwa dom, magoc bu ma dac whiŋ. Ma Ŋalau Dabuŋ, naŋ Ŋalau Yom Ŋandô-ŋga, naŋ puŋ yom ŋandô pi iŋ dôn bocdinaŋ. ⁷ Boc-dinaŋ, gêŋ tö sêwhê iŋ sa, ⁸ naŋ Ŋalau, bu, ma dac. Ma gêŋ tö dinaŋ sêpuc dau dôn. ⁹ Yac dakôc yom naŋ lau sêhoc asê pi Yisu, naŋ sa, ma bocdinaŋ yom bocke naŋ meŋ akêŋ Anötö, naŋ dakôc sa eŋ, bu Anötö ndê yom hôc gêlêc ŋamalac si yom. Ma Anötö kêŋ gêŋ tö dinaŋ tu bu whê iŋ ndê Atu sa têŋ yac. ¹⁰ Asa naŋ kêŋ whiŋ Anötö ndê Atu, naŋ kôc Anötö ndê yom pi iŋ ndê Atu sa sip iŋ ndê ŋalôm. Magoc asa naŋ kêŋ whiŋ Anötö dom, naŋ tôc asê bu iŋ gêlic Anötö ndê yom gitôm yom tasan. Ŋahu bu iŋ kêŋ whiŋ gêŋ naŋ Anötö kêŋ bu whê iŋ ndê Atu sa, naŋ dom.

Mwasin dandöc taŋli ŋapaŋ-ŋga

¹¹ Ma yom naŋ Anötö hoc asê têŋ yac naŋ bocdec bu. Iŋ kêmwasiŋ yac ŋa mwasin dandöc taŋli ŋapaŋ-ŋga, ma datap mwasin dau sa yêc iŋ ndê Atu. ¹² Asa naŋ kêŋ whiŋ Anötö ndê Atu, naŋ tap sen ndöc tali-ŋga sa. Tigen asa naŋ kêŋ whiŋ iŋ ndê Atu dom, naŋ tap sen ndöc tali-ŋga sa dom.

¹³ Mac lau naŋ akêŋ whiŋ Anötö ndê Atu. Aö gato yom dindec, ŋahu bu aö atac whiŋ bu mac

añyalê tidôn bu mac atap mwasin andöc tamli-nga sa su. ¹⁴ Bocdinañ têt ndoc nañ yac bu daten mbec têt Anötö, nañ daten ti atac pa su. Ma yac bu daten gêt nañ gi tap in ndê atac whin sa, nañ yac tañyalê bu in oc ngô yac neñ mbec. ¹⁵ Ma yac bu tañyalê bu in kêt danğa yac neñ mbec su, goc tañyalê bu gêt nañ daten, nañ in oc kôm ñandô sa.

Daten mbec pi lau nañ sêkôm sac

¹⁶⁻¹⁷ Mac bu alic nem asidôwa dan kôm sac, goc aten mbec têt Anötö bu nem in kwi e in mbu meñ mbo señ dandöc tañli-nga tiyham. Mêtê hon nañ so Anötö ndê lêt, nañ mêtê sac, ma in gêlic bu gêt ñambwa dom. Magoc sac hon gic waê lambwam dom. Aten mbec tu lau nañ sêkôm sac kain dinañ-nga. Mêtê sac dan yêc, nañ gic waê lambwam solop.* Aten mbec tu lau nañ sêkôm sac kain dinañ-nga dom, bu oc nem ñac sa dom.

Yom ñambu-nga

¹⁸ Tañyalê bu lau hon nañ Anötö kôm ñac sêtiwakuc su, nañ sêhu mêtê sac sin. Anötö ndê Atu yob ñac ñapep ma Sadañ gitôm dom

* **5:16-17** Lau ti gauc mêtê-nga gauc gêm bu Jon ndê yom pi sac nañ gic waê lambwam solop, nañ ñahu bocdec bu. Lau nañ sêkôm mêtê sac ñapan ma sêlic bu gêt ñambwa, nañ gitôm sêpuc dômbwê Anötö ti in ndê yom, ma sêpu Yisu ndê mbac ndu tu ñac si sac-nga (Hib 6:4-6; 10:29-31). Tu ñac si sac dinañ-nga dec ñac sic waê bu sêsip lambwam sêndi. Ñac si ñalôm ñadandi sa su, ma yac bu daten mbec tu ñac-nga, dec oc nem ñac sa dom. Alic yom nañ Yisu sôm pi sac nañ Anötö oc suc kwi dom (Mat 12:31; ma Mak 3:29).

bu êmasec ñac. ¹⁹ Ma yac tañyalê bu yac dati Anötö ndê balêkoc su, magoc lau hoñ nañ sêkêñ whiñ dom, nañ sêmbo Sadañ ndê gôliñ ñapu.

²⁰ Ma yac tañyalê bu Anötö ndê Atu sip nom meñ ma whê yac neñ gauc sa bu tañyalê Anötö Yom Nandô Nadau. Ma yac dambo iñ ñalôm, ma dambo iñ ndê Atu, Yisu Kilisi ndê ñalôm bocdinañ. Iñ dau Anötö ñandô, ma ti yac neñ dandöc tañli ñahu.

²¹ Aneñ balêkoc, ayob daôm ñapep bu anem akiñ anötöi gwam dom.

Anötö ndê Yom Lêñsêm Wakuc
Bugawac: Anötö ndê Yom Lêñsêm Wakuc New
Testament

copyright © 2013 Lutheran Bible Translators Australia

Language: Bugawac

Contributor: Wycliffe Bible Translators, Inc.

All rights reserved.

2020-11-11

PDF generated using Haiola and XeLaTeX on 29 Sep 2022 from source
files dated 17 May 2022

1dcc5a6c-3c1e-54e8-aa77-af18a3782048